



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 10

May 5 nü Mamata-i CM menden atema tenangzükba agitsü

IOC 'Believe in Sports' campaign ambassador asütsü Sindhu shim



VOL. XVIII NO. 199 (ADOK 199) DIMAPUR

SANGTENNÜ (TUESDAY)

MONUPII (MAY) 04, 2021

₹ 5.00

COVID-19 Nagaland: Nisung 101 dak putet; 6 asü

Kohima, May 3, 2021 (TYO): Hombarnü Nagaland nung nisung 101 dak COVID-19 aliba putetogo aser parnok züngsema nisung ajak agi 14,451 kümogo.

"Tanü nisung 101 dak COVID-19 aliba putetogo. Parnokji Dimapur nung 77, Kohima nung 11, Mon nung 4, Mokokchung aser Zunheboto nung asemsem (3), Longleng nung 2, aser Peren nung 1 lir. Maneni, nisung 30 taneptsü angu. Parnokji Dimapur nung 26, Mokokchung nung 3 aser Kohima nung 1 lir" ta Health & Family Welfare Minister, S Pangnyu Phom-i metetdaksü.

Nisung 14,451 rongnungi 12,352 taneptsü nguogo aser tang nisung 1,584 anepaludar, ta paisa ashi.

"Nagaland nung COVID-19 nungi taneptsü angur 85.28% dang kümogo" ta State Nodal Officer for Integrated Disease Surveillance Programme, Dr

Nyanthung Kikon-ia ashi.

"Tang anepalurtem rongnung nisung 118 dak shirangba yimya terara lir, 20 tera timtema oxygen agidar, 18 kanga shiranga oxygen agir, 3 kanga mejungi lir aser nisung 5 ventilator nung lir. Nisung 1,420 dakbo shirangba yimya kecha mali" ta paisa metetdaksü.

Dimapur nung COVID-19 puteta alir nisung 6 asüba züngsema tasür ajak agi nisung 115 kümogo, saka parnok 10 bo tanga timtem ajanga asü, ta Dr Kikon-isa ashi.

Nagaland nung COVID-19 puteter nisung 427 tashi tanga state temi ogo, ta paisa shisem.

"Tang tashi nung Nagaland nung COVID-19 alitsü akok ta temolung melema bilemba sample 1,48,556 tendangogo. RT-PCR ajanga 79,434, TrueNat ajanga 38,359 aser Rapid Antigen Test ajanga 30,736 tendang" ta Dr Kikon-isa metetdaksü.

Assam, Manipur & Meghalaya nung COVID-19 kanga menateper

New Delhi, May 3, 2021 (Agencies): Assam, Manipur aser Meghalaya nung COVID-19 kanga menatepa aoer ta Hombarnü Union Health Ministry-i metetdaksüogo.

"India nung COVID-19 kanga timba akümba state tem rongnung Assam, Manipur aser Meghalaya dena lir" ta Union Health Ministry nung Joint Secretary, Lav Agarwal-i ashi.

"State kar nung COVID kanga puteter. Item state nung kanga kümdangtsüla. State temji Andhra Pradesh, Assam, Bihar, Chandigarh, Haryana, Karnataka Kerala, Himachal Pradesh,

Manipur, Meghalaya lir" ta paisa metetdaksü.

Deobarnü Assam nung nisung 2385 dak COVID-19 aliba puteta liasü. Deobar anogo nungsa Assam nung COVID-19 ajanga nisung 30 asü.

Külen, Meghalaya nunga Deobarnü taküm küm asoshi nisung timtiba dak COVID-19 aliba puteta liasü.

Yashi nisung 321 dak COVID-19 putet aser nisung 5 asü.

Deobarnü Manipur nunga COVID-19 agi shiranger nisung 5 asü aser 256 dak virus aliba putetogo.

Centre-i oxygen concentrator nung GST agiba aitsür

New Delhi, May 3, 2021 (Agencies): India nung medical oxygen agi anüingba agi COVID-19 agi shirangertem aika taküm samaba mapang ka nung Centre sorkari oxygen concentrators nung Goods & Service Tax (GST) maneni agir.

Centre-i tangalen nungi bener aruba oxygen concentrators nung GST ajemogo saka tax maneni agiba atema nisungtemi ola adoker.

Honibar aonung Union Finance Ministry-i tangalen nungi bener aruba oxygen concentrators nung GST 28% nungi 12% ajema liasü.

Haryana Deputy CM Dushyant Chautala-i Centre sorkar dang India nung Covid wara tanabuba agi kangshiba

mapang oxygen concentrators nung Goods and Service Tax magitsüla ta ayongzükogo.

Dushyant Chautala-i Union Finance Minister Nirmala Sitharaman dang public-i oxygen concentrators jenjang dalang agi alitetsü atema GST magitsüla ta shidi ka züluogo.

Maneni, Delhi Deputy Chief Minister Manish Sisodia-ia Union Finance Minister Nirmala Sitharaman dangi iba atema shidi ka züluogo.

"India sorkar aser GST Council-i ita trok atema danga oxygen concentrators nung GST magitsü atema telemetba agitsüla" ta Sisodia-i ashi.

Centre sorkari oxygen concentrators nung GST maneni agiba atema nisung aikati sorkar aitsüogo.

Kohima aser Dimapur nung tesem aika 'Containment Zone' akümtsü

May 5 nungi tenzükter anogo 7 atema ozüng agütsür

Dimapur, May 3, 2021 (TYO): Nagaland nung Dimapur aser Kohima kübok tesem aika Containment Zone kübok dendaktsüba o s a n g metetdaksüogo.

Hombarnü Nagaland Chief Secretary J Alam,

IAS-i iba osang metetdaksüogo.

Iba ya May 5, 2021 aonung 7:00 ako nungi tenzükter anogo tenet atema alitsü aser Containment Zone kübok Dimapur Municipal Council; Chumukedima Town Council; Dimapur-Chumukedima four lane road anasa aliba colonies/villages; Kohima Municipal Council aser New Capital Complex tesemtem adener.

Containment Zone nung ozüngi melartem dak alaka tanga nisungtem senzüsönbongba aser maparen ajak noktanger.

Iba tenokdangba mapang Containment Zone nung aonsotsü, shi/ango, mamatzü ayokertem aser grocery stores ajak anepdang 6:00 ako nungi nikongdang 2:00 ako tashi dang lapoktsü melar.

Maneni, petrol pumps akhi ama lapoktsü saka nisung lokti madenshitsu aser electronic & print media, telecom/ internet service providers nisungtem senzüsü melar.

Iba mapang Dimapur Airport lapoktsü saka staff aser passengers dang senzüdaktsüsi aser nisung anenzükba hotel tem nung staff ishika dang ser lapoktsü melatsü.

Maneni, restaurant telung



nung chiyungtsü achiajemba noktanger saka take-away mesüra home delivery inyaktsü akok.

Pei pei ward/colony ketdangsurtemi pei telongtet nung dokantem lapoktsü atema tetuyuba agütsüsi.

Nija passenger garitem 'ODD-EVEN' system nung senzüsü saka nisung 50% dang amentsü melar.

Bus, taxi, auto, two-wheeler taxi amala public transport vehicles (public & private) nung nisung 50% dang amentsü melar saka district ka nung item gari 25% dang senzüdaktsüsi. Iba atema pei pei District Task Force-i inyakyim latetsü.

Oxygen/ oxygen cylinders aser tanga medical osettem dena khu abenba garitembo tenokdangba kübok madener. Maneni, animal healthcare, hospitals, clinics, nursing homes, pharmacies aser healthcare workers menokdang.

Tenokdangba kübok COVID-19 vaccine agitsüpurtem, COVID tendangtsü aser medical emergencies madener.

District Administration, Police, Security forces, Fire & Emergency services, Home

Department, Medical, Postal services, NIC, NSDMA, Home Guards & Civil Defence, SDRF, Power, PHED, Food & Civil supplies, Finance, Treasury and Accounts, Banks/ ATMs, IT & C, IPR, AIR aser

Doordarshan nung inyaktertem tenokdangba kübok madener.

Construction activities aser Agri & allied activities nung nisungtem madener.

Asüpila sentep sentong nung nisung 20 dak tema adentsü memelar.

Administrative Heads of Departments/ Heads of Departments/ Heads of Offices-i pei pei department nung core group tentetsü aser parnok office nungdakterm inyaktsü. Tanüingba sorkar mapa inyaker ajak mapa nungloktsüba inyaktsü atema renema alitsüla, ta District Task Force-i pei pei district nung 'Night Curfew' maneni agitsü akok aser inyakyim akangakanga benshitsu atema mita anüktüla.

April 29, 2021 nü sangoktsüba ama Nagaland nung tamangba yimsü dak sendakba tesemtem dena lokti adenshiba tesem ajak shibangtsü. Ajisiuaka, Deputy Commissioner dang nungi jelia temelaba meshiba sülen kiyimba sentongtem agitsü akok.

Item tetuyuba alema inyaktertem Indian Penal Code nung Arrla 188 kübok temerenshi alitsü, ta District Task Force-isa metetdaksü.

ENSF-i Nagaland sorkar nem anogo 13 züngzüktsür

Kohima, May 3, 2021 (TYO): Nagaland nung backward kin 6 nem sorkar mapa nung 25% lezmüktsüba mapa tenzüktsü atema anogo 13 züngzüktsür, ta Hombarnü Eastern Naga Students' Federation (ENSF)-i metetdaksüogo.

"Tanü onoki Nagaland chief minister Neiphiu Rio den ajuruteper aser anogo 13 tsüngda iba mapa inyaktsü atema mapang züngzüktsüogo" ta DUDA Guest House, Kohima nung ENSF President, Sepili L Sangtam-i osangbener dang ashi.

"May 3 nungi 15, 2021 tashi onoki mapang züngzüktsür aser iba tsüngda mapa kecha mekümba onoki commission

mesüra ketdangsurtem anema ken o benoktsü. State sorkari 25% reservation policy sangoktsüba mapa tim mesüi inyaktertem anema onoki noktaksü" ta Sepili-isa metetdaksü.

"2008 küm backward kin 6 nem 25% job reservation latet aser 2009 nungi mapa inyaktsü tenzük. Onoki RTI benoka Personnel & Administrative Reforms (P&AR) Department-i inyakba mapa ajak repringdangogo aser iba nung Nagaland Public Service Commission (NPSC)-i tim mesüi inyakba ajitetogo" ta paisa ashi.

NPSC-i RTI telangzüba agitsüba nung aser ano P&AR

Department nungi sangdong ajanga non-eastern backward tribe nungi nisungtemi combined technical examination nung mapa 34 tashi anguba shia lir aser iba atema aoksar, ta ENSF President-isa metetdaksü.

NCS, NPS aser Allied services indang combined technical examinations nung parnoki mapa 34 den timba nguogo. Sorkari sangdong kasa, reservation policy kasa dang agitsü süra kechiba backward tribe 6 balaka senzüka ayur. NPSC-i non-eastern backward tribe nem mapa agitsüba atema osang tejangja metetdaksütsüla, ta Sepili Sangtam-isa ashi.

"My Naginimora My Home" mission tenzükogo



Mon DC Wb. K Thavaseelan-i "My Naginimora My Home" sentong tenzüksüba mapang.

Dimapur, Monupii/May 03 (TYO): Naginimora jila nung terenlok balala lidaktsütsü nükjidong nung "My Naginimora My Home" nungja agütsür sentong ka May 01, 2021 nü Town Council hall, Naginimora nung tenzuka liasü, kong Deputy Commissioner, Mon K Thavaseelan, IAS tesemdanger tongti liasü.

Additional Deputy Commissioner, Naginimora, Vineet Kumar, IAS ajanga iba sentong indang rateta ashi, aser terenlok tsütsü nüburtem tsüngta tali temeimtep lidaktsütsü nükjidong nung iba mission ya tenzü, ta ashi.

Iba mission ya ajanga mera

asem, "Town Beautification and Cleanliness", "Infrastructure and Service Delivery" tajungba kumdaktsüba aser "Sustainable Economy" adokdaktsüba nung nüburtem shilem agidaktsütsü.

Iba mission anitsü atema Administration, Department balala aser Civil Society Organisation tem nungi züngsemtem dener committee asem tentettsü.

Iba sentong nung sanitation worker temi meranga inyakba atema Deputy Commissioner, Mon ajanga tenüngsang agütsü aser parnok nem PPE osettem agüja liasü.

Paisa department aser NGO tem dang maneni meranga

inyaktsü ajungshi aser nüburtem dang jila nung nüburtem ajungtsü aser terenlok atema iba mission nung kibur ama alitsü ayongzüka liasü.

Iba sentong nung SDO (Power) Naginimora, Nyoingam Konyak menden liasü, KU, Naginimora tir, Khampei Konyak-i o tatsüka jembiba mapang jila nung tarutsü nükla aser iba mission nüngdaka aliba indang lemsatop.

Tesemdanger tongti ajanga Town Council Hall kima süngdong ka tema liasü. Iba sentong nung HoDs, NGO lenirtem, jila nungi lenir balala, pastor aser school balala nungi principal tem dena liasü.

Phek nung African Swine Fever indang awareness sentong agi



Phek district nung African Swine Fever atema awareness aser mozü agütsüba sentong agidang tangokba noksa ka yangi angur.

Kohima, Monupii/May 03 (TYO): Phek District kübok African Swine Fever agi mokongshie aliba block tem nung iba tashidak poktetba nungi nokdangtsü mechi District Level Pig Federation den Chakhesang Women Welfare Society, Department of Animal Husbandry & Veterinary Services, Phek District aser North East Initiative Development Agency (Tata Trusts indang sentong ka) lungjemer April 26 nungi April 29, 2021 anogotem nung Porba, Pholami, Gidemi, Enhulumi, Sumi, Leshemi, Lasumi, Pfutseromi, Thetsumi aser Zhavame yimtsüngtem nung African Swine Fever indang awareness drive den Classical Swine Fever atema mozü agütsüba sentong agia liasü.

Iba sentong agiba mapang, Dr. Rosou Pohena, Veterinary Assistant Surgeon, Veterinary Dispensary Pfutsero ajanga ak metsürtem den African Swine Fever poktetba, iba tashidak yimyatem, menatepa aoba lenmangtem, tashidak nungi

kumzüka alitsü aser iba tashidak agi menerper aser asüba ak tem junga indoktsü indang onüktem nung ajemdaker sensaksem kaa liasü.

Enhulumi yimtsüng nungi ak dak sample atema azü agiteta liasü, kong African Swine Fever ya pokteta alitsü südi, ta temolung melemi lir.

Ak metsüba ajanga nüburtem nem rongsen lenmang bener arutsütsü atema Pig Federation-i

inyaktettsü meratem indang Dr. Vihelie Sanchu, Senior Project Associate, NEIDA ajanga jembiba liasü.

Iba sentong nungsa ak 504 nem Classical Swine Fever mozü agütsü, takep nung komu-longra adokba, saktü-pokshi aser danga timtem anepalua liasü.

Kasa mapang ak metsür men facemask, mesen tepsetba mozü, vitamin aser mineral mixture amala lema agüja liasü.

Ketdangsürtem pei lemsükba tesem nung alitsüla: APC

Dimapur, Monupii/May 03 (TYO): Agri & Allied Department tem den senden amenba nung ajemdaker, Agri & Allied Department nung Administrative Heads aser Heads of Department dang District Officers/ Sub-Division Officers tem pei lemsüksüba tesem nung (place of posting) atema totuyuba agütsütsü shiogo, ta Agriculture Production Commissioner ajanga sangdong ka nung ashi.

Tia maka tziungsarusa/yipru aitba, tsünüsempongtsü mesen

agi achiba aser kiset shiruru dak tashidak adokba tensa aser timtem ajurura, pei tata department ajanga district, sub division, yimtsüng shia item osangtem bendener temaba ketdangsürtem nem agütsütsü, ta sangdong ajanga ashi.

Tang tensa mejungi aliba mapang Agri & Allied Departments indang AHOD/HOD ajak dang District ketdangsürtem den osang agitepa tajungtiba nung asameyangtsü mepishir, ta sangdong ajangasa ashi.

Mon aser Naginimora nung mozüki aser ki kar shibangtsür

Dimapur, Monupii/May 03 (TYO): COVID-19 tashidak wara prokshia aoba tajungtiba nung azüoktsü mechi, Deputy Commissioner, Mon, Thavaseelan K, IAS ajanga May 01, 2021 nü sangdong ka nung Tamong village nung Committee Gate kübok Yokwang ki den atonga aliba ki aser Thamnan Ward, Mon Town nung House No. 284 shibangtsür, ta metetdaktsü.

Ano sangdong danga ka nung Deputy Commissioner, Mon ajangasa Rapha Hospital, Mon Town ya ghonda 48 atema shibangtsür, ta metetdaktsü.

Item tenokdangba nung aibelener nisung kar danga lira, Disaster Management Act 2005 indang Section 51 nungi 60 nung mela aliba kübok aser Indian Penal Code indang Section 188 kübok

tapet temerenshi agütsütsü, ta sangdong ajanga ashi.

Naginimora : Additional Deputy Commissioner, Naginimora, Vineet Kumar, IAS ajanga May 01, 2021 nü sangdong ka nung, COVID-19 tashidak wara prokshia aoba nungi nokdangtsü mechi House No. 145, Police Colony, Ward No. 8; House No. 20, Police Colony, Ward No. 8 aser House No. 2, Bazar Colony, Ward No. 8 ya tarutsü nung totuyuba ka magütsü tashi shibangja atar, ta metetdaktsü.

Tenokdangba meratem nung nisung kari danga aibelenba lira, Disaster Management Act 2005 indang Section 51 nungi 60 aser Indian Penal Code indang Section 188 kübok tapet mera agia merenshitsu, ta sangdong ajangasa ashi.

DC Office, Kohima nung Bodhbar nü public interview malitsü

Dimapur, Monupii/May 03 (TYO): COVID-19 tashidak kanga kera züina aoba nokdangtsü mechi, Deputy Commissioner Office, Kohima nung Bodhbarnü dak alaka mapa inyakba anogo ajak nung anepdang 10:00 ako nungi nikongdang 1:00 ako tashi

tongtipang nüngdaktem jembitsu atema public interview alitsü, ta Deputy Commissioner, Kohima, Gregory Thejawelie NCS ajanga sangdong ka nung metetdaktsü.

Bodhbarnü public interview khenyongi malitsü, ta sangdong ajanga ashi.

Phek Police-i nisungpur 2 apu

Kohima, May 3, 2021 (TYO): April 26, 2021 nü Phek jila nung Madhucon Projects Ltd nung mapa inyaker ka sen yong pur aoba dak sendakba ken o nung police-i nisung ana puogo.

Yoruba nunger NSCN (Khango) nung Lt Vevolhu aser Chepoketa nunger NNC/ Non Accordist züngsem Mutuku Vero na apu, ta Phek police-i metetdaktsü.

Tenati Madhucon Projects Ltd nung mapa inyakerji dokan ka nung apu aser tesem kati anir orr oa chiooktsü atema sen lakh 3 meshi, ta police-isa ashi.

Iba osang angazükba sülen Phek police-i temolung melemi bilemba tesem aika mita ao aser public lennirtemi tiyongi ia mapa

inyakba ajanga Madhucon Projects Ltd nung inyaksang chiok.

April 28, 2021 nü police special team kati Phek jila nung Mutuku Vero apu aser iba sülen Deobarnü Yoruba yimdak Vevolhu apu.

Külen, Phek Police-isa April 30 nü Nagaland People's Government of Nagaland (NPGN) NNC/Non-Accordist nung Sgt Major Serayi aser pa den yariteper Suthotsu nunger Venepa na apu.

Tenati Phek jila nung aliba dokantem dang sen meshia senzü aser tena ket nung tashiyim agi sen meshiba shiditem aser Rs 2410 bena aliba apu, ta police-isa metetdaktsü.

DC Dimapur-i DDMA Dimapur senden ayonger

Dimapur, Monupii/May 03 (TYO): Meyi mapang inyaktsü maparen balala renemshia aliba asadangtsü aser COVID-19 tashidak wara azüokba aser ketdangsüba asadangtsü atema District Disaster Management Authority (DDMA) Dimapur, pur 1st quarterly meeting ya Deputy Commissioner, Dimapur indang Conference Hall nung May 05,

2021 anüngdang 12:00 ako nungi amentsü, ta Deputy Commissioner & Chairman, DDMA, Dimapur, Rajesh Soundararajan ajanga sangdong ka nung metetdaktsü.

Iba senden nung züngsem ajaki pei departmental action plan renema bener arua adentsü mepishir, ta sangdong ajanga ashi.

ADC Pfutsero ajanga COVID-19 control room atema metetdaktsür

Dimapur, Monupii/May 03 (TYO): COVID-19 tashidak kanga kera prokshia aoba mechi aser arrsanga tenokdangba meratem agitsü nüngdak ta ajiteta nübur ajak dang COVID-19 yimya aser teinyaktsütem shidak inyaktsü metetdaktsür, ta Additional Deputy Commissioner, Pfutsero Japheth Woch-i sangdong ka ajanga metetdaktsü.

Danga state nungi nisung kar Pfutsero Sub-division-i arutsü sentong alinungbo, COVID-19 Control Room, Pfutsero nem jelia osang agütsütsüla.

Iba atema COVID-19 Control Room, Pfutsero den phone number 8729840597/ 8837371959/9862745089/ 9642415388 ajanga tongteprateptsü akok, ta sangdong ajanga ashi.

Upper Assam nung AJP & Rajior Dal-i BJP yariogo: Congress Nisung timba kati Himanta Biswa Sarma nem CM inyakdaktsünür

Guwahati, May 3, 2021 (Agencies): Upper Assam nung Assam Jatiya Parishad (AJP) aser Rajior Dal ajanga BJP tulu ka yariogo ta All India Congress Committee General Secretary & Assam Congress in-charge Jitendra Singh-i ashi. "Upper Assam tesem nung AJP aser Rajior Dal teloktemi BJP nem takok ngudaktsüogo. Parnoki anema noktaka telok nem kodaser teyari agütsü'ar parnoki kanga junga shisadantsüla" ta paisa ashi. Assam Assembly elections 2021 nung BJP-i menden 60 aser Congress-i menden 29 nung takok angu ta Election Commission of India (ECI)-i metetdaksü. Züngsem 126 agi akümba Assembly nung BJP-i aniba teloktepi menden 75 nung takok

angu aser parnoki maneni Assam nung sorkar akümtsü. Külen, Congress-i aniba Grand Alliance-i menden 50 aser Rajior Dal candidate kati takok angu. Rajior Dal president aser tang tepuokdak aliba activist Akhil Gogoi-i Sibsagar menden nungi takok angu. "Onoki menden 126 agi akümba Assembly nung tebilemsü khuret abenba aser tashitait Opposition ka ama inyaktsü. Onoki Assam nungeri ola adokba atema aser parnok temeten atema maneni inyaktsü" ta Jitendra Singh-isa metetdaksü. "Sorkari Corona wara anema inyakba mapa nung Congress party-i akokba tashi

yariteptsü" ta paisa shisem. Külen, Assam nung teresadang kati BJP lennir Himanta Biswa Sarma nem chief minister inyakdaktsünür. InsideNE-i social media sabang balala nung survey ka agiba nung nisung timba kati Sarbananda Sonowal dang nungibo Sarma nem ang chief minister inyakdaktsünür. Tawa assembly election nung Bharatiya Janata Party (BJP)-i takok tulu nguaka parnoki chief minister shimtsüba asoshi tayongzükba aika ajurutsü ama lir. Prime minister Narendra Modi, union home minister Amit Shah aser BJP national president JP Nadda nungertemi dang chief minister nübo shimtsü ta BJP osang kar ajanga shiogo.

Tripura sorkari aonung curfew atsülanger

Agartala, May 3, 2021 (Agencies): Tripura sorkari Mongolbar nungi tenzüka aonung 6:00 ako nungi anepong 5:00 ako tashi jila 20 kübok tesemtem nung 'Corona Night Curfew' atsülangtsür. Deobar nikonngang osangbener den jembiba mapang, Tripura education minister Ratanlal Nath-i, "Tripura nung Covid-19 tashidak puteter timba küma aoba asadanteta, Mongolbar (04.05.2021) nungi tenzüka aonung 6:00 ako nungi anepong 5:00 ako tashi jila 20 kübok tesemtem nung Corona Night Curfew atsülangtsü asoshi state sorkari telemtetba agiogo" ta ashi. Tripura kübok urban body 20 rongnung Agartala Municipal Corporation, Municipal Council 13 aser Nagar Panchayat 6 dena lir. "State nung April 25 nü nisung 98 dak Covid-19 positive putet, April 26 nü 111, April 28 nü 166, April 29 nü 141, April 30 nü 173 aser May 1 nü nisung 247 dak iba tashidak puteta liasü. Anüngji, item ajak asadantsü Sorkari lenmang kar bushitsü aser iba dak sendakba nung onoki telemtetba kar agiaka, ajungbena mera tasen kar lemtetsü asoshi nungdaka aküm," ta pai shisem. Iba tesashi wara prokba azüoktsü asoshi Agartala aser tanga municipal council tesem aser Nagar Panchayat tesemtem nung aonung curfew mapang melenshitsü asoshi iba telemtetba

agütsü bangjemtep, ta Minister Nath-isa ashi. "Iba curfew mapang melenshiba dak sendakba nung tetuyubatem agütsütsü aser Mongolbar nungi tenzüka item tesem nung curfew mapang tasenba nung anidaktsü. State taskforce chairman aser chief secretary Manoj Kumar-i tetuyuba tejangjatem agütsütsü," ta Nath-isa metetdaksü. Sorkar office lapokba mapang tem melenshiogo aser mapang tasenba ji anepong 10 ako nungi nikonngang 4 ako tashi alitsü. "Non-gazetted employee tem pei pei kidang nungi inyaktsü aser office nunga teinyaker shilem 50% dang melatsü. Rongdak mapa kar danga adokra, phone ajanga tongteprateptsü aser idangji mapa inyakerkem office jagi aotsüla," ta Nath-i ashi. Minister-i ashiba agi, AMC tesem telungtet nung dokan ajak aser sorkar office tem nung Covid19 test agütsü asoshi chief secretary-i tetuyuba agütsütsü. State nung Sorkar mozüki aser Covid-19 centre jenjang asadangshia, Nath-i, sorkari contract nung MBBS doctor 100 aser nurse 100 nem mapa agütsütsü akok aser nungdaka tetuyubatem nung anidaka parnok mapa ya teti (regularise) atema agütsütsü akok, ta ashi. TPSC ajanga, regular scale nung Sorkari doctor 100 nem mapa agütsütsü telemtetba agiogo, ta pai shisem.

Arunachal Pradesh nung nisung 102 dak Covid-19 putet

Itanagar, May 3, 2021 (Agencies): Arunachal Pradesh kübok tesüiba ghonda 24 tsüngda nisung 102 dak Covid19 putetogo. Directorate of Health Services, Arunachal Pradesh ajanga sangdongba Covid19 bulletin nung, sample 2,435 tashi tendangba nungi sample 102 nung iba tashidak putetba shia lir. Tashidak tasen puteter rongnung nisung 24 dak

shirangba yimya lir aser nisung 78 dakba iba tashidak agi kangshiba yimya mali. Kasa mapang, nisung 83 tashi shirnok taoba mapang Covid-19 puteta liasü, parnok ajak taneptsü ngur sülen tesüiba ghonda 24 nung mozüki nungi anizükogogo. Tashidak tasen puteter densema Deobarnü State nung Covid-19 tashidak puteta alir nisung 18,738 tashi kümogogo. Ano külen, iba tashidak

nungi taneptsü angur 83 densema, state nung nisung 17,273 tashi iba tesashi wara nungi taneptsü nguogo. Arunachal Pradesh nung taneptsü angur shilem 92.18% lir. Maneni, tang Arunachal Pradesh nung iba tashidak agi teshirangdak alir shilem 7.50% alitsü. Ano külen, state nung iba tashidak agi nisung 59 süogogo, koba tasüba shilem 0.31% alitsü.



Tripura Tourism Director, Raval Hamendra Kumar-i West Tripura nung District Magistrate inyaktsü ta Tripura Law Minister Ratan Lal Nath-i metetdaksüogogo. West Tripura District Magistrate Shailesh Kumar Yadav-i State Chief Secretary Manoj Kumar dang pa anema bushisüngdang matem tashi DM aser Collector mapa nungi anena atatsü mepishia züluba sülen iba telemtetba agiogo. April 26, 2021 aonung Manikya Court aser Golap Bagan, Agartala nung night curfew alema kiyimba sentongtem ayonga agidang Shailesh Kumar Yadav-i oa noktanga liasü. (Agartala, May 3)

Mizoram nung nisung 74 dak Covid-19 putet

Aizawl, May 3, 2021 (Agencies): Tesüiba ghonda 24 nung Mizoram state kübok nisung 74 dak Covid-19 positive putet aser iba wara ajanga nisung 1 süogogo. Tang Mizoram nung Covid-

19 tashidak puteter nisung 6,358 tashi kümogogo. Kasa mapang iba wara agi nisung 16 süogogo. Tang Mizoram nung nisung 1296 shi Covid19 agi shirangdar. Ano külen, state nung mezüng Covid-19 puteter rongnung nisung 5,046 tashi taneptsü nguogo. Tashidak tasen puteter rongnung Rapid Antigen Test (RAT) mapang nisung 70 aser TrueNAT test nung nisung 4 dak iba tashidak puteta liasü. Tesüiba ghonda 24 nung Zoram Medical College (ZMC) indang RT-PCR lab ajanga tendangba sample ka nung danga Covid-19 puteta mali. Deobarnü, Dam Veng, Aizawl nungi arishi küm 64 tain ka iba tashidak agi asü. Aizawl anasa Zoram Medical College nung nikonngang 5:30 meta nisungba ya asü. Kasa anogo, Mizoram nung mozüki balala nungi taneptsü angur nisung 61 tashi yokadokogogo.

GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA

NO. DTE/ ESTT-2/02/2020-21/ Dt. Kohima, the 3rdMay, 2021.

NOTIFICATION

In continuation to this office notification of even number Dated, 1st April, 2021, the issue of NSEE forms and last date of submission either by post or by hand is hereby extended till 25th May 2021, 5:00 PM. Students who have appeared / to be appeared Class 10+2 Science with PCB/PCBM or equivalent are eligible to apply.

NSEE form can be collected from the office of the Directorate of Technical Education on all working days or can be downloaded from the website www.dtenagaland.org.in in which case, the fee should be paid while submitting the form printed in white paper (A4 size).

(VipulhouLhoungu)
Joint Director

Issued by DIPR

<p>Bank of Baroda</p>	<p>HIGH SCHOOL JUNCTION BRANCH High School Junction, Vizo Commercial Centre, Kohima, Nagaland- 797 001 Email: vjhigh@bankofbaroda.co.in</p>	<p>SALE NOTICE FOR SALE OF IMMOVABLE PROPERTIES "APPENDIX- IV-A [See proviso to Rule 6 (2) & 8 (6)]"</p>						
<p><small>Security Interest (Enforcement) Rules, 2002 nung Rule 6 (2) & 8 (6) nung aliba ama Securitisation and Reconstruction of Financial Assets and Enforcement of Security Interest Act, 2002 kübok Immovable Assets yokdoktsü atema E-Auction Sale Notice. Bank of Baroda, Secured Creditor nung Authorised Officer-i tsünglanglen agüja aliba Secured Creditor indang mortgaged/charged kiojen tsünglanglen agüja aliba account/s indang sentsüh atema yokdoktsüba osang ya public nem aser talisa Borrower (s) aser Guarantor (s) nem sangoktsür. Tsünglanglen Borrower/s / Guarantor/s / Secured Asset/s / Dues / Reserve Price / e-Auction date & Time, EMD aser Bid Increase Amount osang tejangja agüja lir.</small></p>								
<p>Sr/ Lot No.</p>	<p>Name & address of Borrower/s / Gurantor/s</p>	<p>Detailed description of the immovable property with known encumbrances</p>	<p>Total Dues</p>	<p>Date & Time of E-Auction</p>	<p>Reserve Price, EMD amount, Bid Increase Amount.</p>	<p>Status of Possession (Constructive/ Physical)</p>	<p>Branch Name & Contact No.</p>	<p>Property Inspection date & Time</p>
1	<p>M/s. Speedwell Prop. Mr. Impa Longkumer, S/o Masatuba Longkumer, House No.1, Block No.1, Lower Chandmari Colony, Below Cross Wonder Church, Kohima, Nagaland-797001 Mr. Tenjuk Aier S/o Wati Aier, House No.123, Diphupar, Dimapur Sadar, Dimapur, Nagaland-797112 Mrs. Yangtila Longkumer W/o Mr. Impa Longkumer, House No.1, Block No.1, Lower Chandmari Colony, Below Cross Wonder Church, Kohima, Nagaland-797001</p>	<p>All that Part and parcel of Flat (2BHK) having built up area 1581 Sq.ft. bearing the Flat No. 6F-02 at First floor, 6th wing, Palm Spring Apartment under property No. 6/2, Mestripalya Jakkasandra, 7th Cross, 16th Main 4th Block, Koramangala, Bangalore -34 in the name of Mr. Impa Longkumer,</p>	<p>Rs.1,98,73,459.16 as on 30.09.2019 (inclusive of interest upto 30.09.2019) and interest thereon together with Incidental Expenses, Cost, Charges etc.</p>	<p>20.05.2021 1:00 pm to 3:00 pm</p>	<p>Rs.55,00,000/- Rs.5,50,000/- Rs.1,00,000/-</p>	<p>Physical</p>	<p>High School Junction Kohima Branch, Contact No. 6000926316</p>	<p>17.05.2021 10:00 am to 2:00 pm</p>
<p>Osang tejangja metetsü atema yimlibilema https://www.bankofbaroda.in/e-auction.htm and https://ibapi.in nung agüja aliba link nung reprangangma.</p>								
<p>Date: 03.05.2021 Place: Bangalore</p>								
<p>Sd/- Sukleshwar Basumatary Authorised Officer Bank of Baroda, HSJ Kohima Branch, Nagaland</p>								



TIR YIMYIM YIMOBILEM (EDITORIAL)

DIMAPUR SANGTENNÜ, MONUPII (MAY) 04, 2021

Ibai mapang tajung

Asenok meshirangi kümdanga alitsüsa Covid-19 tashidak wara ajanga bener arutsüba mapangba ya asenok ajak asoshi mapang tajung ka lir ta bilema asenoki tajung – tajung dang inyaktsü bilemra, shitakba mapang tajungji tang ya asütsü. Aji oda, ibai asenok pei taküm nung mazüoktetba aser memelenshitetba jakla yimyatem azüokba aser melenshiba mapang tajung ka asütsü. Corona tashidak wara ya aruyonga – maruyonga asenok ajak kenübo asütsü, anungji Corona tashidak agi asütsü tsübu shisabolua kecha meinyaki mejanga kazütsüba mapang masü saka mapabo tangsa teinyakba inyaktsüla. Ibai asenok kinunger ajak külemi longjema aliba mapang lir, anungji tsüraburtemi tanurtem dang tim sayubentsü o shia ki mapa inyaka amongtsübaji tang yasa mapang tajungtiba lir. Aji oda, tanurtem asoshia tanur asüdangyongi tsüraburtem nem dang yaridakja aruba to küpdoka, tang mapangba ya anepdang yakta saker tsüraburtem nem süngo yanglua agüja tenzükba nungi soruchioka chiyongdaksür külenang ano, akok tashi kidang lia senotsü terabosa aatsü lenmang bilemdanga inyaktsüba mapang tajungtibaji jala jabasotem asoshi tang ya lir. Ibai aonung piyong mobile phone amshia kazür, anogo piyong mejanga kazütsüba mapang masü saka tsürabur aser adianutem den kidang otsü tajung jembia külemi mapa tasen-tasen bilemteta inyaktsüba mapang lir ta tanurtemi rajemtsüla. Mobile phone nung asenok jembitsü, repringtsü aser metettsü asoshi enokja akaba ajak ya tangarbo asenok dang nungi sen meshizüksü asoshi purapiteta yanglur enoktsüba lir aser parnoki imlaba amaji, asenoki anogo piyong chiyong dang dena mobile mechioki amshir. Item ajakji angati masü saka asenoki parnok nem sen agütsür amshir saka asenokbo kecha meinyaki mapang tajung ajak mobile amshidang endoker. Item ajakji rajema asenok tang kidang külemi amongba mapang ya asenok tsürabur- tanur ta mali, asenok ajak mobile phone den masü saka kinungertem den mapang peria agüja mongra, asenok arishi tepiyong nung mapang tajungtibaji tang corona wara agi asenok kidang mongdaksüba mapangba ya asütsü. Talisa, ano kidang tanur tila alir tsüraburtem asoshia pei kiji kaketreju kümer, anepdang nungi aonung tashi kaketreju nung amato, kaket azüngtsü, zülutsü, chiyongtsü, ki mapa inyaktsü, asayatsü, mejangtsü aser saksü mapang balala lemsaa yur, anogo aoa memeteti tanurtem den kodanga mamatettsüsa amongtsüba mapang tajungtibaji tang ya asütsüla. Tang ama tashidak wara agi tanurtema kakkerejui moutet aser tsüraburtema akhi ama pei mapai sadema moutet ta amongba mapang ya, shinga atemaa, taküm aser kibong raksaba mapang masütsüla. Iba mapangba ya akok tashi tai putepba mapang masü saka tajung repringteta ajungshitepba aser yaritepba mapang ka sädaktsütsüla. Tashidak wara liang teli, alimabo mesama tashi odang aotsü aser taküma masü tashi odang liyonga aotsü, anungji kechikoma tia ka nung lidir liaka, asen taküm ya, kidang asüyonga, tanga nung asüyonga, tangar asoshi teyarir tajung ka süa alitsü merangtsübaji kanga tongtibang lir. Alima nung ya, shiba südir süang, talangka alitsübaji tongtibang masü saka junga alitsübaji dang tongtibang lir. Kechi tia nung, kodang südir süang, asenok junga lira, asenoka alimai aru langa liogo ta bilemdi. Atangji, junga alitsüba ya nisung kar dang temelaba agir alitsüba mapa ka masü saka asen mulung, asenoki junga linüra junga alitsü aser mejungi linüra mejungi alitsü. Junga linür ser nung mejungi lira, ibaji tangar tai masü asen tai asütsü. Tajung tamajung tashidak aser temoatsü, taküm aser tasü ajak Kibuba Tsüngrem ket nung lir, anungji asenoki inyaktsüba mapajibo, Tenüngsang Ken 37.3 nung ashi ama, Tsüngrem dak amanga tajung- tajung inyaktsübaji dang lir. Aji oda, Tsüngrem dak amanga tajung inyaktsüba mapang tajungtibaji tang ama tashidak wara tamajung agi amokmerenba mapang tamajungtiba ya ka asütsü. Atangji, mapang tamajungtiba tang tajung inyakntem asoshibo mapang tajungtiba lir.

OLEMSABANG

Tenzükba Nung Arok Shilem

~ Wati Longchar (Sernapore)

(Yashi adok nungi...)

1960s aser 70s tashi, Nagaland schooltem nung tesayur tetsür aikabo maliasü. Tetsüria school nung sayutettsüna? tanurtemi tashi angatsüna? akhümtsübutsüna? tanurtem azüoktettsüna? ta sensena jembi. Tamakoktsü mapa ka agizüker amai bilem. Saka tanübo tetsürtemi tenendakba aser tajungba sayur ta ajaki shiteter. Arogo nung tenzükba mapa ya temiem mapa, teyaritep, amalitep, tanela nung tajungshi o, yamala mapa aika alinungji tetsürtemi tabensaba aser tenendakba inyaktettsü. Tebur kübok dang alenpanger ayuba ajanga tetsür tenzükba lenisüba kübok temoatsü Aori ano magidang. Temoatsü magidang sür nung karibo, tetsüribo meinyaktettsü ta jembiba angashiogo. School nung tesayur tetsür-ang tajungba ta tanü tangatetba melenshiba ama putu ka nungbo arogo nung tenzükba maparen nungya tetsüriang tajungba, tenendakba inyakteter ta meteta arutsü ta nibo bilemer. Tanü China aser Indonesia nungbo ordained minister tetsür teimba aser parnoki tebur dang nungi tajungba aser lendong mapang tasü aita tenzükba kuli lir. Indonesia nungbo Muslim nunger extremist teloki sentep malitsü nokdangdang tetsü pastor kati tasü ita sayutsüngidang kaseba otsü asenoki züngogo. Tanü China nung arogo zünba kuli kaji tetsürtemi kibok nung kiyonger dang Khrista indang kuli tasü ita kuli asüba ajanga ta ashir. Church of South India nunga ordained pastor 300 dak tema lir. Yisu shia aruogo ta mezüng kulisurtem aser alemli arogo nung tongti tenzükter jenti tetsür liasü. Aotsüribo meinyaktettsü na? Nungloktsürbo inyaktettsü. Ya teburi mapa nungloktsütsü temulung muluteter dang ta metetdi.

Putu aika dang nokdanga arur, 1992 nungi tetsür ABAMi ordain süa aru. Rev. Dr. Noksangla mezüngbuba ordain asü aser Ao arogo otsü nung tapak tasen ka lapok. Tebur ajak agi tanü tashi nung 260 ordain süogo, saka tetsürbo parnok 16 dang. Tetezü, tebur 16 tema ordained asüdang, tetsürbo 1 dang asür. Tetsür aser tebur ordain asürtemji tetsüngda kanga tulu ta sayur. Kechiba tetsür ordain masütsüsa akümer? Ordain süaka pastoral mapa nungbo sadema mamshiteter. Sadema inyaktsüsa arogo structure sadema mali, yimtsüng putu menden amai dang bener aor. Pastoral mapa sadema inyaktsü atema license tashi nungdak mali amai bilemer. Aori anir tenzükba Eastern kintem arogo aika nung tetsür-tebur temendang mali deacon aser pastor inyaker, saka Ao arogo tem nungbo missionarytemi tenzükba yutsüba nungi mainshili ta asüba yagi arogo tesüleni aor.

Arogo yimsüsüba yayim melenshitsü nungdak

Tetsürtem sadema pastoral mapa nung inyaktettsü asoshi Ao arogo structure yanglushitsü nungdak ta ajiteter. Ao arogo nung mapang talangka dang arogo yintiba yimden nung tetsür telok ya arogo tilaka (mini church) amai inyaksangshi ajak nung bener aru. Arogo yintiba nung aliba tenüktelen aser luden balala ajak arogotsür telok nunga lir, tat. agi, deaconsür, mapangtsür, arogotsür mission board, tenla-tenji, tershilem - talisa aonsotsü, süngjanglijang, kiset shiruru tenla arogotsür dangi abener. Arogo aika nung arogotsür senbonga balaka aser Asso. Pastor (W) nema arogotsüri dang itasen agüja aru. Saka tanübo arogo aika nung melenshia arudaki. Saka putu aika dang, tanü tashi arogo kar nungbo, arogo yinti nung tetsür nem sadema shilem magütsür. Pastor aini aodanga sünga Deacon tambusangi incharge agia ataba otsü lir. Temelen shisemba ama, Ao arogo aika nung tetsür deacon meshimer. Anungji iba structure ya dang bener ao tashi tetsürtemi sadema meinyaktettsü. Pastor mapa ya tebur mapa, tebur dang shimtsüla, kasaji Mungdang nunga tetsür department dak alaka tanga secretary post yabo tebur mapa ama dang bilemstü aser yamaji tebur dang shimer. Asso. Pastor (W) aser Youth Pastor atema pastoral licence nungdak mali ta jembitsü. Ya structure tai ajanga ta metetdi. Iba tangatetba ya melenshitsü nungdak. Hau, Tenzükba mapa tali tabensaba aser tajungba inyaktsü atema tetsür, tebur, lanur aser tila-tanurtem ta telemsa ayubaji tajung, saka iba mapa dak alaka tetsür aser youth pastor arogo yinti nung shilem mali amai angatetbaji melenshitsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Covid wara mapang tepuokdak alirtem nem Laishiba 100,000 agütsü



Coronavirus wara mapang US nung aliba jail ka nung tepuokdak alir nisung pezüi Prison Fellowship Ministry-i lezmükba Life Recovery Bible azüngba noksa nung angur.

May 03, 2021: US nung prison ministry tulutiba- Prison Fellowship-i Coronavirus wara mapang (tesüiba ita 9 tsüngda) tepuokdak balala nung alirtem nem Laishiba 100,000 dak tema lema agütsüogo; covid wara mapang nung Tsüngrem O bushir jenti liasü.

Osangbener den interview ka nung jembidang Prison Fellowship Ministry nung CEO, James Ackerman-i, Laishiba jenti lemtsüba ya Tsüngremi ajungshiba ajanga inyakba sayatenya mapa ka lir, ta ashi.

Prison Fellowship Ministry ya linük tesem ajaklen tepuokdak alirtem aser parnok kibongtem tenzükba ministry ka lir.

"Iba wara ajanga nisung aika teimla sama aser tepuokdak alirtema aikati Laishiba nüngdaka liasü. Tesüiba küm 45 tsüngda tang amai nisungtemi Laishiba nüngdakba ama onoki kodanga majangshidang," ta Prison Fellowship CEO-isa metetdaksü.

"Linük shibangba mapang nung tepuokdak alir tetsürtem aser teburtem semdangertem maliasü mesüra parnok atema sentong kecha renema magi, ibayongji parnok teimla kanga samar liasü," ta pai metetdaksü.

"Tsüngrem O ajungkettsütsü atema Tsüngremi nüburtem aser Chaplian tem melungjang nung ajungshia liasü. Yisu Khrista osangtajung ajanga teimla agütsür, yamaji nisungtemi Laishiba kanga nüngdaka akümba ajanga ni kanga ajungmesoa liasü," ta pai ashi.

Prison Fellowship Ministry ya (asür) Chuck Colson-i tenteta liasü aser 2016 küm tatembanglen iba ministry nung Ackerman Tir shim.

Tepuokdak alirtem nem Lasihiba angati lema agütsütsü nükjidong nung 2018 küm Prison Fellowship-i Tyndale House Publishers den senteper The Life Recovery Bible adoka

liasü.

Life Recovery Bible denji külemi Inside Journal aser Prison Fellowship indang osangkaket lema agütsü.

Iba Laishiba nungji 12-step recovery model lir, koba ajanga tepuokdak alirtemi temesepba chiyungtsütem indokba nung yaritsü oacetem keta lir.

1976 küm tentetba Prison Fellowship-i tesüiba küm aika Laishiba lema arur, ajisüaka ano iba mapa tuluba atemzükter inyaksü atema parnoki Tyndale House den partnership yanglu.

Ackerman-i, "Yimya tamajungtem toktsütsü atema zülua aliba Laishibaji onok atema kanga tongtibang liasü. Tyndale-i adokba Life Recovery Bible ya onoki aginüba ama kanga tetemsü liasü," ta metetdaksü.

US nung tepuokdak balala nung alir shilem 65 shibo temesepba mozü achirtem lir, ajisüaka parnok rongnungi shilem 11-i dang treatment agir liasü, ta Behavioral healthcare system Vertava Health-i metetdaksü.

Ackerman-i, "Life Recovery Bible ajanga Yisu den taküm tasen tenzüktsü atema maongka agütsür. Iba ya yimya tamajung tokja taküm melenshitsü nükjidong yur adokba Laishiba lir, saka kasa Laishiba nungsa item nisungtemi pei taküm den medemdanga azüngtsüsa ocat aika keta lir," ta ashi.

Prison Fellowship-i survey ka agiba ajanga tepuokdak alirtem aika ket nung Laishiba maliba jangjaa liasü. Iba survey nungji Jail Chaplain temi shilem agia liasü.

"Tesüiba ita 9 tsüngda Prison Fellowship-i The Life Recovery Bible 100,000 lema agütsüogo," ta Tyndale House Ministries CEO, Scott Mathews-i sangdong ka nung metetdaksü.

Mathews-isa, "Onoki parnok (Prison Fellowship) den

partnership yangluba atema pelar aser parnok tepuokdak alirtem ket nung Tsüngrem O agütsüba atema pelar, kechiyong tepuokdak alirtemi Laishiba nung aliba tashi kanga nüngdaka liasü," ta metetdaksü.

2018 küm Tyndale den partnership yangluba sülen tang tashi nung Prison Fellowship-i Laishiba ajak agi 162,000 lema agütsüogo.

Tyndale-i Life Recovery Bible million 3 dak tema adokogo aser iba Laishiba ya English aser Spanish oshi naprongla nung angutsü.

Ackerman-i ashiba agi, coronavirus anema linük shibangba aser jail tem nung sentong kecha magiba agi tepuokdak alirtem kanga jashitsü, ta ketdangsertemi bilema liasü, ajisüaka parnok nem Laishiba lema agütsüba ajanga parnok teimla angu.

"Item Laishiba nung keta alibatem ajanga tepoukdak alirtem süngjema aküm, talisa Khrista dak amangertemi tamang jenjang ano tajungba akümtsü atema Laishiba azüng. Iba dak alia Khrista dak mamangertem asoshia Laishiba lapoka züngdangtsüji tayongzükba ka liasü," ta Ackerman-isa ashi.

"Laishiba 100,000 lema agütsütsü atema onoki nüngdakba ama Tsüngremi onok nem lenmang lapoktsü. Ibaji ajanga asenoki langka tajung inyaksü nükjidong yura Kibubai kishi ka lapoktsüba dang masü saka nüngdak-a ajak peritsür ta kuli jangjar," ta pai ashi.

Prison chaplain temi Prison Fellowship indang online store, The Storehouse ajanga item Laishiba, devotionals aser ministry materials mangatsü akok.

Tesüiba ita 9 tsüngda lema agütsüba Laishiba 100,000 nungjagi 70,000 bo The Storehouse ajanga mangaba liasü.

ANO GO ABEN TSÜNGREM DEN

Telemtetba

Parnok chiyongzükter külen Yisui Simon Peter dang ashi, "Yona chir Simon, item dangi tali nai ni meimer asü?" Yohan 21:15.

Asenoki Pa tsüngdang tamakok angudang Yisui tesüngmangtsü lemanng ka nungi Pai agizükter! Pai asenok luja mejembir. Pai asenok maitsür. Asenok tesashiba tendangtsü asoshi asenok telemtetba akatsü Pai masüngdang. Iba melen Pai asenok ajar aser asenok Pa meimba akangshitsü Pai asüngdang.

Peter kodang nütsüngtem den atsüki nungi jena ao pai pa masterba tsüngdang kanga mejungi tamakok angu. Tesülen, pai yimjak nung pai Yisu magizük. Yisu kanga dang lendongpang nung alidang Peteri Yisu nütsüng ka sütet asübo ta pa süngmangseta alitsü.

Na küm tasen ka tenzükdang nai lemanng aisü nung Yisu tsüngdang tamakok nguogo ta sasa bilema alitsü südi. Na temulung lemtetta mesüi arur alitsü akok. Pai ne den jembiba nung nai tashi mangai arur alitsü akok. Ne taküm yimya nung Pa magizüki arur alitsü akok. Yisui Peter ajaba ama Pai na ajatsü. Pai na asoa meblemetsü. Pai na mezüngmeshia masütsü. Pai ne dang nai Pa meimba meyipa repringshitsü asüngdangtsü. Pai Peter dang asüngdang, "Nai ni meimer asü?" Peteri ama, "Au, Kibuba" ta langzürä, Pai pa tenangzükba na asoshi akangshitsü. Nai atangji Pa meimra, nai Pa dang tashi angatsü (Yn. 14:15). Yisui ne tekümtetba menüngdaker, na bendanga agütsüshitsü menüngdaker mesüra iba küm merangshitsü nangzüktsü menüngdaker. Yaküm nai Tsüngrem dang tashi angatsü renemba nung temulung lemteta melitetti arua lira, iba jagi taküm küm takok mangutsü. Yisui ne temeim asüngdang. Nai atangji Pa meimra, iba küm ne mapa Pai aginüba ama alitsü.

Covid ajanga Sri Lanka nung ano tanaben Tenla kitem shibanger

May 03, 2021: Sri Lanka nung ashia.

tang agi tasembenbuba coronavirus prokba agi linük nung ano tanaben Tenla kidang tekülem sentong agiba anendaktsüba dang masü saka Tenla kidang kiyimba sentongtem aser Sunday school tem shibangdaksüogo.

Iba dak alia linük nung universities, schools aser pre-schools-a ajak shibangdaksüogo.

Asüpila sentongtem nung nisung 25 tashi dang adentsü melar aser asüpila dak sendakba sentongtemji ghonda 24 tashi nungbosa agitsüla.

Tesüiba anogo ishika tsüngda Sri Lanka nung coronavirus case asemüsü agi timba kümogo aser anogo shia iba tashidak agi shirangertem timba-timba asür.

Nisung aika dak coronavirus putetba agi hospitals aser treatment centers aika nung yipten tazüng mali, ta ketdangsertemi metetdaksü.

Seeduwa nung sunday school tesayur, Samantha Niroshani-i, wara tensa ano tamajungba akümba agi Tenla kidang tekülem sentongtem, Sunday schools aser tanga sentong ajak anendaktsüogo, ta ashi.

"2019 küm nungi tenzükba tang tashi Sunday schools, tekülem sentong, Khristmas carols aser Arogo sentongtem mapang shia anendakja arur," ta Choir züngsem, Niroshani-i

Colombo nung aliba Christ the King Arogo-i social media nung sangdong ka ajanga, osang ka memetdaksü tashi tekülem sentong ajak anena atar, ta metetdaksü aser Moragado nung aliba St. Sebastian Arogoia tekülem sentong ajak anena atar, ta metetdaksü.

Niroshani-i ashiba agi, 2019 küm Easter Sunday nü bomb amshia Tenka ki amakba ajanga ita aika Tenla ki shibanga liasü aser yaküm nungi tenzükba tang tashi wara aliba agi mapang shia Tenla kitem shibanger.

May 2, 2021 tashi nung Sri Lanka nung coronavirus tashidak agi teshirangdakpur 111,705 liasü. May 2 kija nunga nisung 1,843 dak iba tashidak putet.

Health ketdangsertemibo, April ita tomnen sorkari Sinhala benjung aser Tamil New Year benjung melaba agi iba tashidak tali prok, ta sorkar nem tai tongloktsüogo.

Colombo nung tongti putir kati, kobi melii linük nung oxygen agi kanga anüngtsü ta doctor temi metetdaksüogo, ta ashi.

Putirisa, "Yimtenren lenirtemi nüburtem masü saka parnok kibongtem atema dang bilemer. India linük ama makümtsü atema linük kümzüktsü asoshi ajaki inyaksüla," ta ashi.

OLONG PAITEP # 5801

	1				2	3				
4			5							6
						7				
	8									
	9			10				11		
						12				13
14										
						15				
		16								

TIPILEN		LANGTSÜNGLEN	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsüngda	- (4)
16. Tzü shiruru ka	- (4)	jatepba	- (4)

OLONG PAITEP # 5800 TELANGZÜBA

TIPILEN :		LANGTSÜNGLEN :	
1.Lemsa, 3. Osang, 5. Mezüng,		1. Lamem, 2. Sangken, 3. Omen,	
6. Agi, 7. Süra, 8. Tebutem,		4. Asüküm, 7. Sendong, 8. Tejang,	
9. Amen, 12. Odi, 13. Asayar,		10. Tanga, 11. Tazü.	
14. Angsü, 15. Agima.			



SENSAKER ASER TAKAR SENSAXEMER :

Sensaker : Tulus, na yamai takar, oda millionaire akümba miim tasa(secret) ji kechiar ashitsü asü?

Takar : Ni millionaire akümbaji kübutsü ajanga akümba lir.

Sensaker : Wow, süra na millionaire makümdang koma liasü?

Takar : Ni millionaire makümdangji billionaire liasü.

Sensaker : WOW, OMG!

Lilir : WhatsApp

TANÜBO NAI LANGZÜANG

Q. Tianhe ya ____ ajanga yangluba spacecraft tulutiba lir.
 A.China B.India C.Japan D.Russia


(Taruba adok nung onoki langzüksü)

YASHI ADOK TELANGZÜBA : Mumbai

AO OSHI ANGAZÜKDAK:
TANÜ ANGAZÜKTSÜBA OJANG

Dalang
 (adj) oset ka jenjang shitak agi anguba (cheap)
 * Lanuba'er dokan nung oset ajak jenjang **dalang** agi angur.

Talang
 (adj) tatsüka masü (tall/ far)
 · Tebui par jabaso len **talang** nungi aruya angu.



NAI-A YA METETTER MA?

- NETFLIX SABANG AJANGA SAYATSÜ IBA SHOW ASER MOVIE KAR: MAY 2021**
- * **May 4**
 The Clovehitch Killer
 Selena: The Series: Part 2 - Netflix Original
 Trash Truck: Season 2 - Netflix Family
 - * **May 5**
 Framing John DeLorean
 The Sons of Sam: A Descent into Darkness - Netflix Documentary
 - * **May 6**
 Dead Man Down
 - * **May 7**
 Girl from Nowhere: Season 2 - Netflix Original
 Jupiter's Legacy - Netflix Original
 Milestone - Netflix Film
 Monster - Netflix Film
 - * **May 8**
 Mine - Netflix Original
 Sleepless
 - * **May 11**
 Money, Explained - Netflix Documentary
 - * **May 12**
 Dance of the Forty One - Netflix Film
 Oxygen - Netflix Film
 The Upshaws - Netflix Original
 - * **May 13**
 Castlevania: Season 4 - Netflix Anime
 Layer Cake
- (Maneni asüng adok nung...)*

SUDOKU # 5844 TELANGZUBA # 5843

4	9	6	1		7	5	9	8	2	1	7	5	6	3	4		
3	5			9		2		7	1	3	4	6	8	5	9	2	
2	7	5			4	9	5	4	6	3	9	2	7	8	1		
			2			5	7	8	7	9	5	4	3	1	2	6	
		1			6	2	9	8	6	2	4	9	1	7	8	5	3
7	2			5		4		1	3	5	8	2	6	4	7	9	
8	9			4	7	5	6	2	3	6	8	2	5	1	9	4	7
1	7		3						2	9	7	6	8	4	3	1	5
			2			3	7		4	5	1	7	3	9	2	6	8

OJANG LUTEP # 5387

- ENIJUNTAGL :
- SÜMA :
- TAUNGMAJLENI :
- EMBILA :
- JETETMBIER :
- LOTEK :
- NGNROUNG :
- ATI :
- AKMAI :
- NSEDEM :

OJANG LUTEP TELANGZÜBA # 5386

**LOKTI TEJAKLENI ANIR AOTSÜ ASOSHI LENNIR DAK
 ASALENTONG TAJUNG NÜNGDAK**

TAN HOPTA ATEMA - KOMA SÜLA ?

Q.Asen lima nunga Covid-19 tashidak wara agi amokmeren tialong nung assembly election agi nunga koma süla ?

May 5 nü Mamata-i CM menden atema tenang zükba agitsü



Kolkata, May 03, 2021: Hombarnü Raj Bhavan nung West Bengal Chief Minister aser Trinamool Congress tongti, Mamata Banerjee-i Angh, Jagdeep Dhankhar ajurua sorkar akümtsü asüngdangba noksa nung angur.

New Delhi, May 03 (Agencies): West Bengal Chief Minister, Mamata Banerjee-i maneni chief minister inyaksü atema May 5, 2021 nü tenang zükba agitsü, iba sülen anogo ka lir May 6 nü protom speaker, Subrata Mukherjee-i ketdangsüa council of minister tem tenang zükba agidaktsütsü, ta sorkar osang ka ajanga metetdaksü.

Hombar aonung 7:00 ako nung Mamata Banerjee-i Bengal Angh, Jagdish Dhankar ajurua sorkar akümtsü atema asüngdangogo.

Amongnü election osang sangdongba sülen anogo ka lir Hombarnü osangbenertem den

jembidang Mamata-i, Nandigram nung vote azüngba kuli jangjatsü atema forensic examination agitsüla, ta takhangba agitsü.

Election Commission-i BJP tetuyuba nung inyakogo, ta aija Mamata-i, Nandigram nung vote züngshitsü atema kechiba Election Commission-i temelaba magütsü, ta asüngdang.

Mamata-isa, Nandigram nung Returning Officer-i, vote tanaben züngshitsü temelaba agütsüra pa taküm lendongi ila, ta pai shiogo, ta metetdaksü.

Trinamool Congress tongti lenirisa, election osang sangdongba sülen-a BJP-i la aser lar party amokmerener, ta

aitsü. Taoba mapangtem nungbo election nung takok anguba sülen Ato kilonseri phone ajanga la den jembia aruogo, saka tang mezüng Ato kilonseri la den mejembi, ta lai metetdaksü.

Tawa agiba West Bengal election nung Trinamool Congress-i assembly menden 213 tashi nung takok ngua liasü. State nung assembly menden 292 nungi Trinamool Congress-i menden 213 nung takok angu, BJP-i menden 77, ISF-i menden ka aser Independent candidate kati takok angu. 2016 küm election nunga Trinamool Congress-i menden 211 ngua liasü.

India nung ano nisung lakh 3.68 dak Covid putet aser 3,417 asü

New Delhi, May/Monupii 03 (Agencies): India nung ano nisung lakh 3 tema dak coronavirus putet aser iba tashidak agi shiranger nisung 3,000 dak tema süogo, ta Hombarnep Union Health Ministry data ajanga metetdaksü.

Tang tashi nung linük nung nisung ajak agi crore 1.99 tema dak iba tashidak putetogo aser iba tashidak agi nisung lakh 2.18 dak tema süogo.

Tesüiba ghonda 24 tsüngda nisung 3,68,147 dak coronavirus putetba sülen linük nung coronavirus case ajak agibo 1,99,25,604 jungogo, ta health

ministry-i metetdaksü. Tesüiba ghonda 24 tsüngda nungsa iba tashidak agi shiranger 3,417 asü aser linük nung iba tashidak agi asür ajak agibo 2,18,959 jungogo.

Tang linük nung iba tashidak agi teshirangdakpur 34,13,642 lir aser iba tashidak agi shiranger anepba shilemji 81.77 lir, ta Health Ministry-i metetdaksü.

Tesüiba anogo tenet tsüngda India nung nisung lakh 26 tema dak coronavirus putetogo aser nisung 23,700 dak tema süogo.

ICMR-i ashiba agi, May 2 tashi nung samples ajak agi 29,16,47,037 tendangogo aser iba nungji Amongnü samples

15,04,698 tendangba densema lir.

Tesüiba ghonda 24 tsüngda iba tashidak agi asürtemji (3,417) Maharashtra nung 669, Delhi nung 407, Uttar Pradesh nung 288, Karnataka nung 217, Chhattisgarh nung 199, Rajasthan nung 159, Punjab nung 157, Gujarat nung 153, Tamil Nadu nung 153, Haryana nung 145 aser Jharkhand nung nisung 115 asüba densema lir.

Linük nung iba tashidak agi nisung timba asüba state asemji- Maharashtra (70,284), Delhi (16,966) aser Karnataka (16,011) state tem lir.

Covid nokdangtsü atema lokti tulu adenshiba nokdangtsüla: SC

New Delhi, May 03 (Agencies): Tang linük nung Supreme Court-i Central aser state sorkar tem dang lokti adenshiba sentongtem nokdangtsüla, ta metetdaksü.

"Onoki Central aser State sorkartem nem lokti tulu adenshiba sentongtem nokdangdaksüner. Nüburtem kümzüksü atema sorkartemisa linük/states shibangtsü akok," ta SC-i ashi.

"Linük/states shibangba ajanga loktiliba aser rongsenkettsüng nung kongshibaji onoki meteta lir, talisa sensakertem kongshibaji onoki meteta lir. Anungji shibang nunga nüburtem nüngdak peritsütsü atema jelia renemer alitsüla," ta SC-i metetdaksü.

SC-isa, states aser Union territories ajak nung, residential mesüra identity proof maliyonga hospital temi shirangertem agizüksüla, ta metetdaksü.

Justice, DY Chandrachud-i aniba bench-i Centre sorkar dang hospital tem nung shirangertem agizükba

inyakyim ka hopta ana tsüngda renemang, aser state sorkartemia kasaji beshitsü; iba inyakyimji merenem tashibo residential mesüra identity proof dang lokti adenshiba maliyonga hospital temi shirangertem ajak agizüksüla, ta metetdaksü.

"Tang sensotem kanga timtemdar. State balala nung inyakyim balala lir. Linük tesem ajungalen hospital balala nung shirangertem agizüksü atema telatetba balala lir, ibaji ajanga timtem aika ajangshidar.

Anungji iba tebilemtsü ya tekaraba nung bentettsüla," ta Supreme Court bench-isa metetdaksü.

"Disaster Management Act nung aliba tashi nung ajemdaker iba dak sendakba inyakyim ka renemtsü asoshi onoki Centre sorkar dang tuyur, aser ibaji linük tesem ajaklen beshitsü.

Shirangertem ajak hospital nung agizüksüsa iba inyakyimji yanglutsüla," ta bench-isa tuyu.

Amongnüa Supreme Court-i Centre sorkar dang, Delhi nem agütsütsü aliba tanüngba oxygen ajak May 3 ayaterm tashi nungbosa agüjang, ta tuyua liasü.



May 03, 2021 nü Kerala yimtiba, Thiruvananthapuram nung Kerala Chief Minister, Pinarayi Vijayan-i Raj Bhavan nung Angh, Arif Mohammed Khan nem Council of Ministers anenba shidi agütsüdang tangokba noksa nung angur.

Taküm July ita tashi Covid vaccine agi meperitsü: Adar Poonawalla

New Delhi, May 03 (Agencies): Tang India linük nung anogo shia nisung lakh 3 tema dak coronavirus puteta aruba mapang nung Hombarnü Serum Institute of India (SII) nung taruba ita aika vaccine agi meperitsü, ta metetdaksü.

Adar Poonawalla-isa, July ita nungi dang vaccines timba yanglutsü imlar, ta ashi.

Osang angazükba agi, tang ita shia vaccine dose million 70 shi yanglur aser taküm July ita nungi ang ita shia vaccine dose million 100 shi yanglutsüa akok, ta Poonawalla-i shiogo.

May 1 nü India nung coronavirus vaccination shilem tasembuba tenzuka liasü, ajisüaka state aika ket nung vaccine peria maliba agi

vaccination metenzüktet. Vaccination shilem tasembuba nung arrshi küm 18-44 purtem nem vaccine agütsür.

India nung coronavirus tensa dak sendakba nung Adar Poonawalla-i, "Linük nung coronavirus tanabuba shilem ya kanga majungtsü ta ketdangsertemi meimlai liasü. India nung coronavirus samadar ta nisung aikati bilema liasü," ta metetdaksü.

Ketdangsertemi vaccine aika yanglutsü atema jelia metetdaksü asü nungbo SII-i pelaseta vaccine aika yanglur lila, ta paisa ashi.

Tang India nung Serum Institute of India (SII)-i AstraZeneca aser Oxford University-i yanglutetba Covishield vaccine yanglur.



May 03, 2021 nü Delhi nung arrshi küm 18 ser temapurtem (18-44) vaccination tenzükba anogo nung Delhi nung aliba COVID-19 vaccination centre ka nung lanurtem tarensena nokdaka aliba noksa nung angur.



Far-right Vox party deputy Javier Ortega Smith-i Madrid, Spain nung election nübuyim ka nung adenba mapang tangokba noksa ka yangi angur. Europe nung coronavirus tashidak agi tamajungtiba kongshiba linük, Spain kübok Madrid nung alirtem regional assembly atema Mongulbarnü election agir.

Syria okadak temabai tir meden atema tokteptsü nübu 3 shim

Damascus, Monupii/May 03

(Agencies): Syria indang supreme constitutional court-i, iba ita tir election nung tokteptsü atema candidate 51 nungi asem shimogo, ta state media-i Hombarnü metetdaksü.

Iba election ya tir Bashar Assad-i akoktsü imlar, shiba Abdullah Salloum Abdullah aser Mahmoud Ahmad Marie na den tir menden atema tokteptsü shimogo. Tetsür tenet densema candidate 51-i iba mapang atema parnok tenung benoka liasü. Tenung benokba sülen Parliament-i tenungtem constitutional court nem agütsü.

2011 küm civil wara adokba sülen Syria nung tang agi tanabenbuba tir menden atema election agütsü lir, koba May 26 nü agütsü. Syria nunger

bendanglen alirtemi May 20 nü vote agütsütsü.

Supreme Constitutional Court tir Mohamad Jihad Lahham-i, okadak ajanga candidate asem agizükogo aser tanungba magizük kechiyong parnoki temzüng ozüng kübok t e n ü n g d a k b a t e m meperidaksütet, ta ashi.

Lahham-isa, candidate shirnoksa magizük parnoki anogo asem tsüngda okadak temepishiba benoktsü temeden lir, ta ashi.

2014 küm Assam-i vote shilem 90 shi akok aser tang agi term pezübuba abentsü atema election paisa akoktsü imlar. Tebu asüba sülen 2000 küm nungi pai tir mapa inyaka arudar. Tebuia linük küm 30 yimsüsügo.

Syria nung 2014 küm nungi

candidate aika nem vote agütsüdakja arudar. Assad den toktepba ya opposition aser anüolen aliba linüktemi pa nem temeden agütsütsü asoshi asameyanga inyakba maparen ka lir ta bilemer.

Alima kintemi taruba election agizüktsü mimlar. UN resolution ka ajanga UN-i achaayanga agiba tir election ka magi tsüngda temzüng ozüng yanglushitsüla aser ibaji nüburtemi agizüktsüla ta shia lir.

March ita Biden administration-ia, tir election ya United Nations tawabangba kübok Syria nunger lokti tentet ajak anisemer tebandang kecha makai sadem sadema magira magizüktsü ta shiogo.

Niger anüolen telungpuri sepai 16 tepset

Niamey, Monupii/May 03

(Agencies): Mali den arrtsü anasa Tahoua region nung mitkartem patrolling senzüba mapang mita atar amakba nung Niger sepai 16 asü aser ka samar bushir, ta osangtem ajanga ashi.

Honibarnü 'bandits' temi amakba lendong nung nisung 16 asü, trok yiru aser ka samar lir, ta Tahoua ketdangsur Ibrahim Miko-i sangdong ka nung ashi.

Pa lendong ajuruba patrolling senzür tanishir, Lieutenant Maman Namewa asüpila sentong nung dena liasü.

Niger anüolen Mali aser Burkina Faso den arrtsü anasa Tahoua lisem lima nungya 2012 küm nungi mapang shia azüdokshia arur.

March ita Mali den arrtsü anasa Niger kübok yimtsüng asem nung sorkar anemer teloki amakdang nisung 141 asü. Niger nung küm ishika tsüngta telungpur telok balalai azüdokshiba rongnung ibai tamajungtiba liasü.

UN ajanga linük 189 indang terenlok asadangba nung Niger ya alima nung tesensaktiba linük lir, aser yangi azüdokshiba ya Mali nungi Nigeria tashi oa kongshir.

Niger anüolen lendong atalokba ya aiben al-Qaeda aser ISIL (ISIS) den sendaktepa aliba telungpur teloktem dak tai

tongloktsür.

Civilian dak iba ama lendong agütsüba ya tang tali kumogo aser Niger anüdoklen yimtsüng aser khen atema anenzüka aliba camp tem nung amakdang nisung 300 dak tema tepsetogo.

Linük anüdoklen kiralongrar südi ta temolung melemi pua alirtem jena aotsü merangba mapang sepaitemi nisung 24 tepset, ta sorkari Deobarnü shia liasü.

Item temolung melemi alirtem ya Banibangou jila nung shishilempaba tesem ka amaktsü sentong liasü, saka mitkar nem osang sangoktsü aser khatepba sülen April 28 nü nisung 26 pua liasü, ta defence ministry sangdong ka ajanga ashi. Kiralongrar südi ta temolung melemi alir ka mapang tatsüka lir injang agi yirutsüba zübu ajanga ashi.

Anasa Chingodan nung mitkartem camp alidaki belener aotsü atatepba mapang Brehostibar aonung jena aotsü meranga tanüker ka indang prangbong rakzük, ta ministry ajanga ashi.

"Parnok amokmerena injang khaloktsüba parnoki senzüka yutsüba sülen parnok 24 kanga mejungi yiru aser ka jena otet, ta ashi aser iba tatalokba indang bushisüngdang tenzükogo, ta metetdaksü.

Myanmar mitkar indang helicopter ka khazüka yok: KIA

Moemauk, Monupii/May 03

(Agencies): Myanmar nung sorkar atena nokdaker rongnung tashi tulutiba aliba telok, Kachin Independence Army (KIA) ajanga Hombarnü sangdong ka nung ashiba agi, mitkartemi tayimtsü amshia amakba sülen meyiper injang khaloktsüba mapang helicopter ka khazüka yok.

Linük north aser east tsütsü arrtsülen mitkartem aser ethnic kin tila nungi telungpur tsüngta raraba ajanga civilian meyirijang aika pei ki yutsür jena ogo, ta United Nations ajanga asadangteta lir. Myanmar mitkar lenirtemi election ajanga shimteta aliba Aung San Suu Kyi'er sorkar February 1 nü atsüngdokba sülen rara tali tesashiba kumogo.

Helicopter ya Kachin province kübok Moemauk jila anasa yimtsüng ka nung anepdang 10:20 ako meta khazüka yok, ta KIA indang information department tekolakba, Naw Bu-i ashi.

"Mitkartemi jet fighter aser helicopter tem amshia iba tesem nung tanep 8 mesüra 9 ako meta nungi amak tenzük, anungji onokia meyiper khaloktsü," ta pai telephone ajanga ashi.

Saka pai kechi prangbong amshia khazüka yokar ajibo

mashi.

MizzimaDaily aser Kachinwaves osangtem nunga helicopter khazüka yokba osangtem prokshia liasü aser noksa tem nung ali nungi mokozü tanak adokba nguogo.

Yimtsüng nung artillery (prangbong tulu) amshia monastery ka nung injang khaloktsüba sülen nisung pezü mozü kidang asü, ta yangji alir kati telephone ajanga ashi.

Myanmar nung mitkartemi sorkar atsüngdokba sülen anogoshia mitkar yimsüsüba anema longkak aita arur.

Deobarnüa Myanmar security forces temi longkak aiter dak injang khalokja nisung ti asü, ta osangtem ajanga ashi.

Sorkar atsüngdokba sülen mitkartemi longkak aiter nisung 765 shi tepsetogo, ta Assistance Association for Political Prisoners advocacy group ajanga ashir.

November ita agiba election nung ashikülak mapa inyakba mechi sorkar atsüngdok, ta mitkartemi ashir, kong Suu Kyi'er teloki takok tulu ngua liasü. Myanmar election commission ajanga November election tajungtiba nung agiogo, ta ashir.

Mitkartemi sorkar atsüngdokba mapang arishi küm 75 tain Suu Kyi aser lar party nungi züngsem aika pua lir.

Bangladesh nung rong ana tsüktep; nisung 25 asü

Dhaka, Monupii/May 03

(Agencies): Hombarnü central Bangladesh nung rong ana tsüktepba sülen nisung 25 süogo, ta police-i ashi. "Onoki nisung pongu kümzükogo aser tasü mang 25 ngutetogo," ta local police tekolakba Miraz Hossain-i AFP dang ashi.

Hombarnü Shibchar jila anasa Padma ayong nung lisem abenba rongka aser nisung 30 mena aliba rong ka tsüktep.

Rong tsüktepba lendong nung ano nisung aika samara bushidar aser fire service ketdangsurtem aser local temi maneni tekümzükba maparen inyakdar, ta tanga police kati ashi.

Bangladeshi nung rong tsüktepba amala ayong aser tzüyim nung lendong atalokba ya tanga tasen masü.

Mongintemi rong tsüktepba lendong ya junga anepalu masüba, rongnendak safety standard tejangja benoka maliba aser rongnung nisung tali bener senzüba ajanga ataloker ta ashi.

Lisem belenba rongtem ya tanga rongtem dang nungi tali nemzüka lur senzü aser tesangwa peria maliba mapang nungbo rong arutsü angutsü tasak asür.

April ita tetenzüklena nisung 50 mena aliba rong ka aser ku abenba rong tulu ka tsüktepba

sülen nisung 30 asü. Coronavirus tashidak tali menatepyonga aoba ajanga linük mokdanga ayutsü asadangtepba mapang nüburtem Narayananj yimti nungi pei kidangi aritepa senshiba mapa iba lendong ataloka liasü.

Taoba küma Dhaka nung June ita rong kati rong ka dak tesülen nungi arua tsükoktsüba sülen iba rong tzüyimi angumoka ai aser iba lendong nung nisung 32 asü.

Maneni 2015 küm February ita nisung aika mena aliba rong ka aser khu abenba rong ka tsüktepba sülen nisung 78 asü.



Isla Mujeres, Quintana Roo state, Mexico nungi Europe-i rong ka nung Zapatista Army of National Liberation, EZLN indang teshimtet nübutem mener aoba mapang nüburtemi teka ayiplokja salem ashiba noksa nung angur. 1519-1521 küm Spain-i Mexico amakba anogomung bilemteta sorkar anema nokdakba telok nungi teshimtet nübutem yagi Spain amaktsü sentong lir, ta ashir.

Pelaba Lemsateper

Asür Mapumenla Tzudir'er (Molungyimsen) kinungertemi mangyim tia ajuruba mapang Kija, Arogotem, kinungertem, kiyongertem aser onok dang temeim sayurtemi nübo, rongsen, shisatsü aser sarasadem ajanga yariba atema kangasa pelaba metetdaksür.

Onoki nenok ajak tenüng teta pelaba meshitetba atema sasar saka nenoki ozü dang taochi sayuba mapa kodanga mamatsü aser Tulusang Tsüngremi nenok ajak molamoshia moajang ta sarasademsür.

*Temeim Chirnurtem,
Semchirtem aser kinungertem.*



Menungra Bilemteter

Asür Kümsangla (Akhoya)

Asü: 04.05.2020

Kodanga amatsü makokba temeim oja nai onok doktsür orr tanü küm ka ajunger. Na meliaka ne temeim mapa tajungtem teti onok den lir. Tanü iba anogo na bilemteta sarasadema amonger.

*Temeim jalatem,
semchirtem &
anükapangtem.*



Office of the District Pensioners' Association

Mokokchung : Nagaland

METETDAKSÜR

Executive meeting 09-04-2021 anogo nung lemtetba Unit Secretaries aser pensioners ajak nem metetdaksür.

Tanü asen lima nung Covid-19 tashidak tali züina aoba ajanga District Pensioners Association General Meeting mekateter. Anungji teinyakdak Executive members aser office bearers ajak mapang tatsüka atema ajak sodi magi atatsü lemtetba metetdaksür.

Covid-19 tashitak nungi jenboa alitsü meji nung District Pensioners Association Office 4th May nungi 31st May, 2021 tashi sodi süa atar. Anungji ajungben nündak kar adokra teküboklen agüja alaiba official den tongtepratepangma.

Sd/-
L. Tia Amri
President
District Pensioners
Association Mokokchung
8787731139

Sd/-
Tatongmayang
General Secretary
District Pensioners
Association Mkg
9612485947

Khonoma nung sentong ka ayonga agiogo

Kohima, Monupii/May 03, 2021 (TYO): Honibarnü (01.05.2021) Terhotsiese, Khonoma nung 'The Khonoma Experience: Tourism Strategies for the New Millennium' ta nüngja agütsür sentong ka ayongzüka liasü. Dolhuni Dz Golato (DDG) ajanga iba sentong achaayanga agiogo. Khonoma nung lipuküm kümzüka/wazüka ayutsü nükjidong yur Dolhuni Dz Golato (DDG) telok ya tenzüik, ta sangdong ka ajanga metetdaksü.

Iba sentong agiba mapang, Khonoma village ya Nagaland nung tourism indang model village ka ama kümstsü asoshi lisopurtem, külem sendaktepa alir ajak aser State Sorkar longjemer iba mapatong mechi asadangshia, tebilemba balala lemsatepa aser asalentong balala renemogo.

2005 küm Khonoma village ya State nung aser iba den külemi Asia nunga mezüing 'Green Village' ama sangdongogo. Iba yimtsüng temeküt aser telungtet ajanga nung süngdonglidong aser shiruru kümzüka aser wazüka ayur, koba Nagaland nung iba amala tesem ya mezüing alitsü.

Iba yimtsüng (Khonoma village) nung alder Alder süngdongtem takok ngua tsünütettar, koba tanga yimtsüng nunga kasa inyakyim ajizüka inyakdaki.

NEPED report ajanga angazükba agi, Khonoma tesem kisüing nung tsük metsüh tapu balala 24 tashi adoker. Iba tesem nung ozü aser shinü (butterfly) tapu balala repranga senzüba maparen nübur tsüingda kanga sapu kümdaki, koba ajanga ostü tajung talisa 'Birdwatcher' adokogo. Iba otsü kaket zülusang Angulie, shiba tourist guide ama inyaka tenzüik, pa tang iba wadang nung takotet ka lir. Tanga tesem nungi ozü reprangi arurtemi pa kanga

sapua kümogo.

Iba sentong nung alakteta tejaoker ama Advisor to Chief Minister, Abu Metha aruagi denogo. Metha-i, Nagaland indang putiotsü nung Khonoma village ya tongtibang tesem ka lir, ta ashi.

Linük aser alima tesem ajungai Naga lima jangjatsüsa aser iba yimtsüng ajanga mera tajung balala agiba atema Metha-i pelaba metetdaksü.

Alima ajunga asüngba COVID-19 wara ajanga tourism sector nung timtem adokdaksüba indang nung Advisor-i jembia liasü. Iba tensa ajanga tourism nung kanga mejung kongshiogo ta metetdaksüba mapang, pai iba tensa ya maangka ama agia junga shisadangtsü, inyakyimtem akangshitsü aser tajungba renemshitsü asoshi telok ajungshia liasü.

Tourism jenjang maneni temabai ajungkettsü aser temelenshi adokdaksütsü asoshi asalentong aser temzüing tajung yanglutsü asoshi pai metetdaksü.

Hornbill Festival benjungmung ya kecha agia matoksatsü aser iba ya Naga nung indang senmang ka ama lir ta asadangshia jembiba mapang, Advisor Metha-i, iba Festival atema sen cr. 5 indokba nungi sen cr. 100 dak tema aruogo/ajanzükogo aser Nagaland nung tourism maparen tsütsü inyakyim tajungba melenshia aotsü nüngdaker, ta telok ayongzüik.

Metha-i, tourism dak sendakba maparen nungi lisopurtem ya külem sendaktepa alir tongtibangtiba lir aser parnok nem tajangzüik timba agütsütsüla, ta ashi. Naga nung ajak dak tangar den jungtepnüba mulungsentsü lir asünung, tourism dak sendakba maparen balala ya tajangzüik aliba inyakyim ka kümstsütsü nüngdaker, ta pai shisem.

Kasa sentong nung Tourism Department, Director, Ajanuo Belho-i, COVID-19

tenokdangba ajanga tourism industry nung timtem balala adokdaksüba asadangteta, iba industry asentenshidaksütsü aser mesamadaksütsü atema Sorkari asalentongtem yangludat. Iba sector nung inyakyimtem tajungba melenshia aotsü asoshi külem sendaktepa alirtem den longjemer "Local Tourism Observatories" tenzüiktsütsü asalentong yangludat, ta ashi.

Iba sentong nung mendenbuba, Kezhasezo Kenneth Punyü-i, iba yimtsüng kisüing atema dang mesüi Nagaland rangben ajanzüktsü mechi Khonoma village nung Tsüngremi moatsüba süngdonglidong aser arem shiruru tem wazüka/kümzüka ayutsü maparen tenzüikba indang telok den lemsatepa liasü.

Nagaland nung raliwalirtem atema Khonoma ya tesem tajunga ka kümstsütsü asoshi Khonoma Nature Conservation & Tragopan Sanctuary (KNCTS) Trust, Khonoma Youth Organisation, Khonoma Students Union, lisopurtem aser külem sendaktepa alir ajak longjemer takok ngua inyakba indang pai lemsatepogo.


Maneni, iba sentong nung Village Council, Khonoma, Chairman, Ratsavilie Vakha-i telok pela agizük. Advisor for TaFMA, Theja Meru-ia iba sentong nung jembigo. Phetsukiku Club, Khonoma-i tetsü-tebo ken ka tena telok saksalemdaksü. President, DDG, Petevinu Seyie-i tepela anküp o jemi.

Iba sentong temer sülen, sensaksemba sentong agia liasü, kong lisopurtem, külem sendaktepa alir aser Sorkar ketdangsürtemi temi onük balala benoka olemtepogo, ta kasa sangdong nung shia lir.

SANGDONGER

Dimapur District, Nagaland nung, ali kuli kakat No. 1096, plot No. 1303, Area . 00-02-13, Mouza No. 2(Two) Block/Ward. 04, koba I.Shilu Yaden indang lir iba li atema shiangai yokyayokchibaren nung tezülutepba mesüra kuli sütepa Kiburi memeteti inyakteptsü makok.

Kari danga temalen aguja aliba kuli kakat nung aliba li atema tezülutepba amshia inyaktepba putetra, aibelener dak temzüing ozüing melaba ama tapet agi merenshitsu ta tanü May 4th 2021 anogo nung metetdaksür.


(Er. I. SHILU YADEN)
Mokokchung, Nagaland

Office of The Foothill Ao Lanur Telongjem Dimapur Entrepreneur Committee ~ Raffle Draw RESULT

1st Prize : 0284

2nd Prize : 2884 3rd Prize : 2405

Consolation Prize : 0659, 0295, 0949, 2866, 3284



California, Monupii/May 03, 2021: Inglewood, California kübok SoFi Stadium nung "Vax Live: The Concert to Reunite the World" sentong agiba mapang Jennifer Lopez-i sabang nung ken atenba yangi noksa nung angur.

French Open nung court shia nisung 1,000 aita daksütsü

Monupii/May 3, 2021 (Agencies): COVID-19 wara pokteter aliba mapang tenokdangba balala agütsür aliba ajanga French Open tenzüker mezüingbuba anogo 10 tashi Roland Garros show court tongtiba asem nung fan 1000 nem asaya reprangtsü atema temelaba agütsütsü aser court tilatem nung nisung shilem 35 arutsü melatsü, ta sports minister Jean-Michel Blanquer-i Deobarnü ashi.

June 9 nü nungi tenzüka quarter-finals asayaba mapang

tang atakzükja aliba ya shilem 65 agi ajungkettsütsü saka 15,000-capacity Philippe Chatrier aser 10,000-seater Suzanne Lenglen courts nung nisung 5000 dak tema marudaksütsü, ta Blanquer-i, France 3 TV channel dang ashi. "Tang atemabo asayamung reprangtsü atema nisung shilem 35 dang arudaksütsü lateta lir aser court shia nung nisung 1000 dak tali marudaksütsü," ta Blanquer-i ashi.

Taoba küm Septemer ita asayaba mapangbo Roland

Garros indang ground temi nisung 1000 dak tali marudaksütsü saka takümba ibadang nung tali arudaksütsü telemtetba agiogo.

Taküm French Open koba hopta ka agi temenoba asayatsü lir, iba asayamung ya May 30 nü tenzüksü.

France nung health dak sendakba nung tensa tamajungba küma mora asaya reprangtsü atema May 19 nü nungi nüburtem nem temelaba agütsütsü, ta tir Emmanuel Macron-i Brehostibarnü ashi.

Asayar ana dak COVID-19 potetba sülen KKR-RCB na asaya thinener

Monupii/May 3, 2021 (Agencies): Indian Premier League (IPL) asayamung nung Hombarnü Kolkata Knight Riders (KKR) aser Royal Challengers Bangalore (RCB) na asayatsü aliba KKR team nungi spinner Varun Chakravarthy aser medium pacer Sandeep Warrier na dak Covid-19 tashidak potetba sülen thinenogo. Kasa mapang nung taoba anogo 14 tsüingda KKR den asayar aliba team tem dang pei sasa lokti nungi pilaa alitsü tetuyuba agütsüogo.

"Varun Chakravarthy aser Sandeep Warrier na dak taoba anogo pezü tsüingda tashidak pezübenbuba tendangba mapang tashidak potetogo. Team nung tanungba züingsem ka dak danga COVID -19 tashidak mepotet," ta IPL sangdong ka ajanga metetdaksü.

"Asayar anaprongla tanungba asayatem nungi pilar temang anepaludar. Medical team-i tena health maneni asadangdar. Kasa mapang nung Kolkata Knight Riders-i, nisung kar dak danga tashidak keta lira tekaratiba nung jangjar temang anepalutsü atema tashidak tendang tenzükgogo," ta kasa sangdong ajanga metetdaksü.

KKR aser RCB na asaya koba Motera Stadium, Ahmedabad nung Hombarnü asayatsü lia thinen, iba asaya asayatsüba anogo takaratiba nung sangdongotsü.

Taoba anogo 14 tsüingda KKR pur Delhi Capitals, Rajasthan Royals, Punjab Kings

aser Chennai Super Kings den asayaago. Osang ajanga ashiba agi, item club tem nungi asayatem dang lokti nungi pilaa alitsü tetuyuba agütsüogo. Item asayatem indang asaya ketdangsurtema quarantine asütsü atema asüingdangtsü akok.

IPL Covid guidelines nung tashidak menar alirtem den ajuruteper alirtem anogo trok lokti nungi pilar alitsüla aser mezüingbuba anogo, tanabuba aser troknübuba nung tashidak tendangba mapang tashidak keta mali ta jangjaba sülen tanaben meyipa arutettsü, ta shia lir.

KKR nungi asayatem dak tashidak potetba aser BCCI indang Covid protocol ajanga IPL timtemi aitsü. Asayamung final May 30 nü asayatsü lateter lir aser international asayatem pei linük tenüng nungi asayatsü atema June tetenzüklen meyipa aotsü, anungi asayamung thinentsü atema mapang kanga petdakra kümogo.

Kasa mapang nung India aser New Zealand na tsüingda ICC World Test Championship (WTC) final Southampton nung June 18 nungi 22 tashi asayatsü lir aser India team atema IPL aser WTC na tsüingda anogo 15 bo nüingdaker.

India nung wara tanaben poktetshir aliba mapang Covid-i IPL daka kongshiogo. Tawa BCCI-i bio-security inyakyim ajungketshiogo, kong test talila agütsüba densema lir. Ajsüiaka tang tashidak potetba ajanga inyakyimtem raksatsütsü akok.

IOC 'Believe in Sports' campaign ambassador asütsü Sindhu shim



Monupii/May 3, 2021 (Agencies): World champion aser Olympic silver medallist PV Sindhu aser world no 11 Canada tsür Michelle Li na International Olympic Committee indang 'Believe in Sports' campaign atema athlete ambassadors asütsü shimogo, ta Badminton World Federation-i Hombarnü metetdaksü.

Tena ya taoba küm April ita nungi BWF indang 'i am badminton' campaign global ambassadors lir.

"Ambassador ama IOC-i shimba ya tetushi tulu. Ni külem asayatem den asaya nung kelaküpong maparen mesera tetoktepba pei ajung asaa azüoktsü merangba anema rara nung nokdaka lir. Asenok ajak longjemra tashi aittsü," ta Sindhu-i ashi.

Sindhu tenüngsanga Badminton Association of India (BAI) general secretary Ajay Singhanian-i, "lai ochimashi inyakyim nung shilem magi-i asaya yimya tajung benshia bendanga agüja asayaba ajanga iba jenjang ajangzüksetogo," ta ashi

"Alima sabang nung iba tetushi agütsüba atema BAI nung ketdangsurtem kanga pelar aser nema adanger," ta pai ashi. Badminton nung manipulation mesera match fixing nung jurila mesera tangkar ajangzükdaksütsü atema asaya mapang aser result melenshitsütsü merangba densema lir.

"Onoki ajaki kasa tetenzükdak line nungi tenzüknar. Ochishia asayatsüji kanga tongtibang kechiyong iba

ajanga pei dak aketba sempet sayur," ta 2014 Commonwealth Games champion Li-i ashi.

Campaign nung shilem ka ama Sindhu aser Li nati online webinars aser social media message balala ajanga badminton athlete community nem tetoktepba balala nung inyakyim raksatsü atema maangka anguba mapang peisasa koda kümzüka alitsü, iba indang tangazükba agütsütsü.

"Tetoktepba pei ajangzüktsü atema melenshitsü merangba ya alima ajunga atema tebilemstsüka kümndar aser ochishia asayaba asayatem kümzüka ayutsüji BWF atema tongtibangtiba mapa lir," ta BWF secretary general Thomas Lund-i ashi.

"Pusarla (Sindhu) aser Li na ambassador ama shima IOC den longjemba ajanga saisapong integrity kümzüka ayutsü atema rara nung temeleshi bener arutsü ta onoki amanger," ta paisa ashi.

Iba campaign ya asayar, coach aser ketdangsurtem nem tetoktepba balala pei ajangzüktsü atema ochi mashi inyakyim ajanga azüoktsü merangba indang tangazükba agütsütsü nükjidong nung 2018 küm amenok.

Jesse-i Julian ket nungi RB Leipzig head coach mapa belenzüktsü

Monupii/May 3, 2021 (Agencies): RB Leipzig-i taruba season atema Jesse Marsch melena head coach asütsü Julian Nagelsmann shimba sangdongogo. America nung coach yagi küm ana atema tenangzüktepba ka yangluogo, ta club sangdong ka ajanga Brehostibarnü metetdaksü. Kasa mapang nung Marsch Bayern Munich nung oa adentsü.

Arishi küm 47 tain Marsch, shiba 2018/19 nung Leipzig indang assistant coach liasü, pa RB Salzburg nungi arua adentsü, kong pai taoba season Austrian league aser Cup kokogo.

2015 nungi 2018 tashi Marsch-i Red Bull meyong

New York Red Bulls club coach mapa inyaka liasü. Marsch ya US nung coach tem rongnungi Champions League nung asayaba team (Salzburg) ka achayangba mezüingbuba coach lir.

"Jesse-i tang tashi nung pai inyakba club ajak nung kanga junga inyakogo. Pa maneni renlokyonga aoer aser pai taoba mapang RB Leipzig nung küm kabo inyakdoker asünung onok asoshi tajangzük asütsü," ta Leipzig indang Head of soccer Oliver Mintzlauff-i ashi.


"Jesse-i club aser yimti kanga junga meteta lir, saka ajak dang tongtibangsa pai team philosophy aser asayaba yimya kanga junga meteta lir," ta pai ashi.

Nagelsmann-i iba hopta season tembangba sülen pa Bayern nung adentsüba osang metetdaksü. Pai Bayern den küm pongu atema tenangzüktepba ka yangluogo.

Leipzig nung Marsch asoshi arishi küm 33 tain Nagelsmann melenzüktsü tasak asütsü, shibai taoba season par team Bundesliga nung tasembuba jenjang tonga aniogo aser iba den Champions League nung semi-finals tonga asayatemogo.

Bundesliga nung asaya asem anunga lia Leipzig puri dang mezüingbuba jenjang nung aliba Bayern team point tenet agi memenepi tanabuba jenjang nung lir aser German Cup semi-finals atongba sülen takok marok ka angutsü maangka lir.

Thisara Perera international cricket asaya nungi anener



Monupii/May 3, 2021 (Agencies): Sri Lanka nung all-rounder aser taoba mapang captain Thisara Perera-i Hombarnü pa international cricket asaya nung anenba sangdongogo.

Sri Lanka Cricket (SLC) nem agütsüba shiti nung Perera-i, lanur asayatem atema lenmang sadema lapoktsütsü asoshi pa asaya nungi anentsü mapang tongogo ta bilemba lemsatepogo.

Arishi küm 32 tain asayar

shibai Sri Lanka tenüng nungi Test trok, ODI 166 aser T20 84 nung asayaago, pa maneni linük balala nung franchise cricket nungbo asayatsü imlar.

"Sri Lanka tenüng nungi World Cups tenet nung asayaba aser Bangladesh nung 2014 küm T20 World Cup final nung India akokba team nung züingoksema takok asoshi teyari agütsütetba atema ni kanga nema danga bilemer. WC akokba ya kü taküm nung takok tulutiba lir," ta Perera-isa shiti nung shia lir.

Kasa mapang nung SLC-ia, national team takok asoshi Perera-i shilem tajung agiba atema pa nem tenüngsang agütsü.

"Thisara ya all-rounder tajung ka liasü, shibai asayar ka ama Lanka Cricket atema aika ajangzüktsüogo aser linük takok kar nung pai tongtibang shilem agiogo," ta SLC CEO Ashley De Silva-i ashi.

BILEM DANGANG

"Memerangdangertemi kodanga aibelen masür."